

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH  
*Munir Ahmad Azim*

24 Février 2017  
(26 Jamad'ul Awwal 1438 AH)

*Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « Le Culte de bane Hindous » dans le cadre de Maha Shivaratree:*

وَاتَّخِذُوا مِنْ دُونِ اللَّهِ إِلَهَةً لِيَكُونُوا لَهُمْ عِزًّا  
كَلَّا سَيَكْفُرُونَ بِعِبَادَتِهِمْ وَيَكُونُونَ عَلَيْهِمْ ضِدًّا

**Wattakhazuu min-dunil-laahi 'aalihatal-liyakuunuu lahum 'izaa. Kallaa! Sayakfuruuna bi-'ibaadati him wa yakuunuuna 'alayhim diddaa.**

*« Zot adopter bane bondiés autre ki Allah, pou ki zot gagne l'honneur. Pas possible. (Bane bondiés là) pou nier ki ti adore zot, et pou vine zot adversaire. » (Maryam 19: 82-83)*

Aujourd'hui, c'est ene congé publique à Maurice (dans le cadre de fête Maha Shivaratree). Peut-être ki dans bane les autres pays aussi zot célébrer Maha Shivaratree. Mo bane camarades hindous fine demande moi, ki azordi dans mo Khutba Jummah, mo cause de zot trois bondiés: Brahma, Vishnou et Shiva.

De ce fait, dans mythologie (c'est-à-dire, bane légende et l'histoire de bane) hindoue, Vishnou li souvent appelé comme la cause suprême de tous bane kitchoses et le créateur de tout kitchose. Bane hindous souvent appelle li *Ishwara*, le Dieu suprême. So supériorité fine même reconnu par Brahma, premier dimoune de la trinité hindoue et par Shiva, troisième dimoune ki forme *Trimurti*. La littérature védique considère Vishnou avec autant de vénération ki Brahma. En fait, alor ki Brahma li considéré comme le Créateur dans bane nombreux livres védiques, ena bane les z'autres ki affirmer ki Vishnou ti le premier et la cause suprême de tous bane kitchoses ki fine crée. Alor (bane hindous) fine attribuer la création avec li, et fine dire ki le monde fine produire ou exister à partir de li, ki le monde en fait li exister dans li, et ki li tousel li la cause de so continuation et ki ene zour ki li-même pour la cause kifaire le monde arrête exister.

Ene légende dans Bhagavata Purana informe nous ki ene fois pendant ki bane saints hindous ti pé faire ene sacrifice lor bane rives du fleuve Sarasvati, ene dispute fine éclater parmi zot concernant ki sanlà parmi sa trois bondiés là: Brahma, Vishnou et Shiva ti le plus grand. Pour résoudre sa différend là, zot fine envoye Birju, garçon de Brahma dans lé ciel, kot tout d'abord li fine alle dans la cour de so papa sans toutefois accorde li l'honneur (et respé) habituel, et sa fine araaze Brahma. Toutefois, puisse-ki sa affront bien grave là fine commette par so propre garçon, Brahma fine calmer so colère et fine épargne Birju punition traditionnel ki li ti supposé gagner en tant ki coupable d'ene tel affront envers ene divinité.

Birju fine ensuite alle dans la cour de Shiva ki fine essaye serre li dans so lé bras avec affection, mais sa sage là (c'est-à-dire, Birju) fine détourne li de Shiva à ene tel point ki Shiva fine extrêmement en colère et fine saizi so trident (*Trishul*) kot li ti envie touye Birju et disperse li. Mais selman Shiva so madame, Parvati fine arriver à temps pour empêche Shiva fer ene tel action. Li fine tombe dans lipié Shiva et plaide bien beaucoup en faveur de Birju, et alors Shiva so colère fine passer.

Après ki Shiva fine pardonne li pour so impertinence, pour so faute, Birju fine ensuite rentre dans la cour de Vishnou, kot là li fine trouver ki Vishnou ti dans ene grand sommeil dans godi so madame, Lakshmi. Alors, Birju fine approche li avec sa couple là et fine donne Vishnou ene bon coup dans so la poitrine. Kan Vishnou fine levé avec sa l'effet de surprise là, mais malgré saki so attaquateur (Birju) fine fer li, li fine saluer li avec respé. Li fine ensuite bien accueille Birju et fine demande li pou assize li, et après quoi li fine demande Birju pour pardonne li si arriver li fine fer ene faute dans l'ignorance et ki à propos de quoi Birju fine trouve la nécessité pou vini pou donne ene coup de pié à ene divinité. Li fine porte so excuse aussi pour kit douleur ki li fine

capave inflige Birju, et alors li fine commence frotte lipié Birju, en affirmant ki sa jour là, avec saki Birju fine fer li, li fine honoré, puisse-ki Birju, sa sage là fine imprime lor so la poitrine à travers so lipié, la poussière de so péché. Bhagavata Purana ajouté ensuite ki au moment kot Vishnou fine fini causer, Birju fine tellement affecté par sa ki li pas fine capave réponde et avec bane larmes d'émotion ki coule dépi so lizié, li fine quitte la cour de Vishnou. Ensuite li fine retourne dans sa lé monde là kot li fine raconte so l'expérience à bane les autres sages kot alor zot tous fine décider à l'unanimité ki Vishnou bizin pli grand parmi sa trois dieux là parski li pas fine laisse li emporter par la colère et passion.

Shiva fine également déclaré ki li fine perdi devant (grandeur de) Vishnou quand, Sri, ki plus tard fine vine madame de Vishnou, fine appaite pour la première fois. Kan li fine trouve li, Shiva fine obséder avec li et ti envie prend li pour li. Toutefois, Sri pas fine accepter li et fine détourne li de Shiva et alor Shiva fine vine extrêmement violent et alor Vishnou fine bizin vini pour sauve Sri. Pour faire sa, Vishnou fine prend l'apparence d'ene zoli madame pou distraire bane démons de Shiva et kot alor sa fine permette bane bondiés là (d'après légende hindous) pou vaincre Shiva et so bane démons.

Ena aussi ene légende dans bane livres védiques ki reconnaîte la supériorité de Vishnou lor Shiva dans bane propres mots de Shiva. D'après Padama Purana, Shiva fine appelle Vishnou *Paramsatyama*, c'est-à-dire l'Esprit Suprême et fine appelle li aussi comme *Parambrahma*, c'est-à-dire, le grand Brahma, aussi bien ki *Narayana*, c'est-à-dire la vérité absolue, sans commencement ni la fin, ki omniscient et omniprésent.

Krishna, le héros de Bhagavad Gita li également généralement considéré couma ene incarnation de Vishnou. Toujours d'après bane hindous, li fine appaite dans troisième l'époque de *Dwapara-yuga* pour aide so camarade et dévo, Arjuna, contre lé roi tyran, **Kansa** ki ti garçon illégitime de madame de léroi de Mathura - ki ti zoli mais stérile, mais ki ene démon ki fine prend l'apparence de so mari fine séduire li (et fine produire Kansa).

En vérité, dans ene point de vue pratique, logique et véridique, sa bane êtres là pas capave prend zot couma dieu (ou bane dieux), parski Bondié, Vrai Bondié li au-delà de tous bane faiblesses humaines. Bondié li au-delà de tous bane relation amoureuse avec ene madame, ou pou prend ene madame (épouse) pour Li et pou gagne bane zenfants, et Bondié, Vrai Bondié, l'Unique Li Celui ki zamais dormi. Li pur, et Li pas affecté par tout saki affecter bane dimounes et So bane les autres créatures. Sa bane êtres là ti sois bane dimounes pieux, ki ti craindre Vrai Bondié (Allah), mais ki bane

dimoune fine prend avec létemps comme bane dieux, sois zot pas même pieux, couma c'est le cas pour Shiva. Quand mo pé dire tout sa là, c'est pas mo l'intention pou blesse sentiments de mo bane camarades hindous, mais pou montrer zot le droit chemin et pou faire zot prend conscience ki l'univers et l'homme li-même pas fine capave être crée par sa bane « dieux » (soi-disant bondiés là) ki la guerre, mais en vérité l'univers et l'homme fine crée par ene sel Bondié ki au-delà de tous bane passions et faiblesses humains.

Mo termine mo Khutba Jummah azordi avec sa bane paroles de Prophète Krishna (as):

(1) « *Bane doutes ki fine posé au cœur de l'ignorance bizin être anéanti par l'arme de la connaissance* ».

(2) « *Ene don/ cadeau/ charité li ene don d'intégrité kan donne li dans bon l'endroit et au bon moment à la personne appropriée, à celui de qui nous pas attane nannié en retour, simplement avec l'idée ki ti bizin faire li (c'est-à-dire, sa don, cadeau ou charité là).* » (Bhagavad Gita 17: 20).

Dans le Quran Shareef Allah dire: « *Bane ki dépense zot bane di biens dans le chemin d'Allah et pas faire suivre zot dépense par ene rappel de zot générosité ou par du mal, zot pou gagne zot récompense auprès de zot Maître. Pou zot, pas pou ena ni peur ni chagrin.* » (Al-Baqara 2: 263).

Alor essaye comprend ki même Vishnou ou Krishna zot bane créatures de Dieu et zot pas ti bane bondiés, et certainement pas azordi aussi, zot pas bane bondiés. Au lieu de sa, zot ti bane dimoune bien pieux et bane messagers de Dieu. C'est donc à moi pou montrer à mo bane frères et sœurs hindous ki nous véritable relation li avec Dieu seul, le Vrai et L'Unique. Ena ene sel Dieu ki exister, parski c'est Li tousel ki l'Auteur de nous l'être, de nous l'existence. Li fine créé tout bane kitchoses nécessaires pour nous confort, progrès et succès. Nous la vie dépanne de So grâce. Nous bane parents, nous bane zenfants, nous bane frères, nous bane sœurs, nous bane épouses, nous bane époux, nous bane camarades, nous bane compatriotes, nous bane gouvernements, nous bane pays, nous propriétés, nous richesse, nous rang, nous l'honneur, nous position, nous bane z'affaires, nous bane travaux, et nous bane vivres zot pas pli proche de nous ki Vrai Bondié (Allah), parski tous sa là c'est So bane dons et Li tousel Li le Vrai Donateur. *Al-Hamdu-Lillah.*